

“დინამო” _ 4:2

თბილისი. “ლოკომოტივის” სტადიონი. 13 მაისი.

“დინამო” (თბილისი) _ “ლოკომოტივი” (თბილისი) 4:2.

“დინამო”: სტეფანია, კანთელაძე, რეხვიაშვილი, ჭელიძე (ჩიტაური), ხინჩაგაშვილი, პეტრიაშვილი, ილიაძე, მაჩაიძე, მჭედლიშვილი (ბურჯანაძე), გავაშელი, ლ. ნოდია.

“ლოკომოტივი”: ბერიძე (აკობია), ფრიდმანი, პანოვი, ქელეხიძე, შხვაცაბაია, ბახტაძე, ჯორბენაძე, ჭოლაძე, მაზიაშვილი, ხუციშვილი, ჭელიძე.

მსაჯი: ვ. ყრუაშვილი (თბილისი).

სსრ კავშირის თასის წლევეანდელი გათამაშება, როგორც ცნობილია, მიმდინარეობს ახლებური წესით: 2-2 მატჩი როგორც მეთექვსმეტედფინალში, ისე მერვედფინალში. ამ სიახლის მოტივი ისაა, რომ რაიმე შემთხვევითობა არ მოხდეს.

საერთოდ, კაცმა შეიძლება იდავოს ამის წინააღმდეგ, რას ჰქვია შემთხვევითობა? თასი იმის თასია, რომ აქ ყველაფერს ერთი მატჩი წყვეტს და მისი სპეციფიკურობაც ის გახლავთ, რომ დაბალი რანგის გუნდს შესაძლებლობა ეძლევა ამ თავისებურ შეჯიბრებაში თავი მოიკლას და ეს ერთი მატჩი მოუგოს ძლიერს. თუ არა და, არსებობს ჩემპიონატი, სადაც შემთხვევითობისა და მოულოდნელობის ფაქტორი მინიმუმამდეა დაყვანილი. ორ-ორჯერ იქ თამაშობენ. თასს სწორედ ის სილამაზე აქვს, რომ გზას უხსნის არა მარტო მეორეხარისხოვან გუნდებს, არამედ გამარჯვების პერსპექტივებს უქმნის ახალბედა ფეხბურთელებს.

მაგრამ, ასე თუ ისე, წესი წესია (მის მიხედვით მეთექვსმეტედ და მერვედფინალებში გამარჯვებულთა საკითხს წყვეტს ქულათა ჯამი, ხოლო ქულათა თანაბრობის შემთხვევაში _ სსრ კავშირის ნაკრებ გუნდში გაგზავნილ მოთამაშეთა მეტი რაოდენობა) და მისი ძალით თბილისის “დინამოს” თავისივე ქალაქის “ლოკომოტივთან” პირველი მატჩის მოგების შემდეგ (1:0) საერთოდ მოგებული ჰქონდა თასის მეთექვსმეტედფინალური ეტაპი. ამიტომ იგი 13 მაისს ფაქტიურად უკვე გამარჯვებული გამოვიდა მინდორზე.

როცა ასეთი მდგომარეობაა, საბრძოლველიც თითქოს არაფერია. “ლოკომოტივისთვის” წაგება-მოგებას, რა ანგარიშითაც უნდა ყოფილიყო იგი, არავითარი პრაქტიკული მნიშვნელობა აღარ ჰქონდა, მაგრამ, მიუხედავად ამისა, რკინიგზელებმა უინტერესო სპექტაკლის გამართვას ნამდვილი სპორტული ბრძოლა არჩიეს და მატჩიც საინტერესო ბრძოლაში ჩატარდა.

მას შემდეგ, რაც დინამოელებმა თამაშის დასაწყისში ვერ გამოიყენეს რამდენიმე ხელსაყრელი მომენტი (კარგად ითამაშა მეკარე ბერიძემ), “ლოკომოტივმა” გაათანაბრა მდგომარეობა და მალე პირველ წარმატებასაც მიაღწია: ჯორბენაძემ 27-ე წუთზე შორიდან ძლიერად დაარტყა კარის მაღალ კუთხეში _ 1:0.

შესვენების შემდეგ დინამოელები სრული ძალით ამოქმედდნენ და ჯერ პეტრიაშვილმა, ხოლო შემდეგ გავაშელმა დააწინაურეს თავიანთი გუნდი _ 2:1.

22-ე წუთზე “ლოკომოტივის” ერთ-ერთი კონტრშეტევა ზუსტი და ძლიერი დარტყმით დაამთავრა ხუციშვილმა _ 2:2.

დარჩენილ დროში უპირატესობა ისევ “დინამოს” ჰქონდა. პეტრიაშვილისა და გავაშელის გოლების შემდეგ ანგარიში გახდა 4:2.

რ. ქორიძე.

“ლელო”, 16 მაისი, 1970 წ.